



阿母的禮物

五月有母親節，誠濟人會送禮物予阿母。我有一個學生囡仔阿慧，刁工揀母親節彼工結婚，共充滿愛恰幸福的日子，送予阿母做禮物。因為這段姻緣是阿母用性命換來的。

阿慧是我十六冬前的學生，從讀國中到今，勢讀冊、生做嬭閣有人緣，這馬咧做珠寶設計師，氣質恰穿插是通人呵咾。阮逐冬歇熱擺會辦同窗會，逐擺問伊，擺講猶無對象，逐家就笑伊嬭人無嬭命，哪會無人拚、揣無『a-ná-tah』？我就想講，可能時代無全，嫁娶對少年的來講，毋是必然的選項。

我恰阮這班的囡仔差十五歲，有人共我當做朋友、阿姊，毋過大部份的人是共我當做阿母，定會來揣我食飯講心事。一冬前的教師節，阿慧係伊的查埔朋友來，算是正式宣佈這個瘦抽條直的查埔囡仔，是伊未來的翁婿。彼工同學若兄弟姊妹，就拚性命出題，欲檢驗伊敢有值得阿慧一世人恰伊做伙？

借問一下，恁是按怎熟似的？阿慧笑笑，目屎煞隨輾落來。三冬前，個阿母想講查某囡仔一個人坐車轉來，行路危險，就騎『oo-tóo-bái』欲去車頭載伊。啥知煞佇半路發生車禍，予一台『thoo-lah-khuh』軋佇輪仔底，當場就無效去矣。阿慧佇車頭瞞瞞看、金金相。後來敲電話轉去厝裡，拄好警方用車牌仔做線索通知個阿爸緊去現場。阿慧聽著這個歹消息嘛隨趕去。啥人知影逐工黏相倚的阿母，煞像天頂的雲飛無去矣。

是這個少年警察陪阿慧處理大細項代誌，陪伊行出阿母無去的萬底深坑。伊用恬恬的陪伴行入阿慧的心肝底。阿慧講，失去阿母予伊一睷仔就愛轉大人，若轉臍的嬰仔，家己喘氣、吼出聲……。

阿慧佇母親節辦婚禮，伊講，三冬落來才了解這段姻緣是阿母的安排。上疼伊的阿母犧牲性命，送予上疼的查某囡一世人用會著的禮物，愛是內餡，幸福是包裝。無好的代誌無一定就無好代誌，三冬後才予伊了解性命的祕密。

作者：王秀容

☆詞彙學習☆

【刁工】thiau-kang：專程、特地。

【穿插】tshīng-tshah：穿著、打扮。

【瘦抽】sán-thiu：形容一個人的身材細瘦、高挑。

【條直】tiâu-tit：憨直、坦率。

【一睷仔】tsit-khùn-á：一會兒、一下子。

【轉臍】tng-tsâi：指生產後，把臍帶切斷的動作。